

02. december 2003

UKA 2003/154

Suliffissanik innersuussisarneq il.il. pillugu Inatsisartut peqqussutissaattut siunnersuut

pillugu

Inatsisartut Inuussutissarsiornermut Ataatsimiititaliaata

ISUMALIUTISSIISSUTAA

siunnersuutip aappassaaneerneqarnerani saqqummiunneqartoq

Inatsisartut Inuussutissarsiornermut Ataatsimiititaliaat suliarinninnermini ukuningga inuttaqarpoq:

Inatsisartuni ilaasortaq Ole Dorph, Siumut, siulittaasoq
Inatsisartuni ilaasortaq Ane Hansen, Inuit Ataqtigii, siulittaasup tullia
Inatsisartuni ilaasortaq Ruth Heilmann, Siumut
Inatsisartuni ilaasortaq Finn Karlsen, Atassut
Inatsisartuni ilaasortaq Per Skaaning, Demokraatit

Inatsisartut Inuussutissarsiornermut Ataatsimiititaliaata ulloq 14. november 2003 siullermeerinerup kingorna Inuussutissarsiornermut, Nunalerinnermut Suliffeqarnermullu Naalakkersuisup, Johan Lund Olsenip peqqussutissatut siunnersuutaa misissuataarjaa.

Aallarniut

Siunnersuut suliffeqarnermik iluarsaaqqinnerup 1998-imi sisamaqiusamik pilersaarusiap suliffeqarnermik naliliisarluni misissuinernik kisitsitigullu paasissutissanik, suliffeqarnerup ilusiligaanerani aqqissuussaananillu, inatsisitigut iluarsaaqqinnermik kiisalu sulisartunik piginnaan-ngorsaaneramik imaqlarluni aallartinneqartup ilagaa.

Suliffissarsiuussisarneq pillugu Inatsisartut peqqussutaat atuuttoq 1988-imeersuuvoq, inatsisillu ullutsinnut naleqqussarneqarnissaa, paasiuminarnerulersinneqarnissaa peqqussummillu atuisunut pissarsiariuminarnerulersinneqarnissaa pisariaqartinneqarput.

Sulisartut ingerlaavartumik piginnaanngorsarneqarnissaannik qulakkeerinninnissamik suliffeqarnermi iluarsartuusseqqinnerup anguniagaa peqqussutissatut siunnersuutikkut tapersiivigineqarpoq, minnerunngitsumik suliffeqarnermi sulisartut atorfissaaruttartut kiisalu suliffissarsiuussisarnermut tunngatillugu ilusiliinerit naleqquttut pillugit.

Siunnersuummi pingaarnerusumik anguniagaq tassaavoq najukkani assigiinngitsuni suliffissarsiuussinermik suliniutit innuttaasut kommunalbestyrelsi aqputigalugu anguniakkamittut kissaatigisaannut naleqqiullugit qanoq ineriartortinneqarsinnaanerannut killiliussassat aalajangersarneqarnissaat. Kommunit eqqarsaatigalugit suliffissarsiuussineq pilersinneqarpoq, peqqussutissatullu siunnersuutikkut matumuuna suliffissamik innersuussisarneq sulisoqarniarnerlu eqqarsaatigalugit kiisalu ilitsersuisarneq siunnersuisarnerlu eqqarsaatigalugit suliffissarsiuussisarnerup nutaaliaanerulersinnissaa atuisunullu piuminarnerusunngortinnissaa suliniutigineqarput.

Inuussutissarsiornermut Ataatsimiititaliap oqaatigissavaa peqqussutissatut siunnersuut matumani pineqartoq suliffeqarnermi peqataasunut, KANUKOKA-mut Namminersornerullutillu oqartussani namminermi tusarniaassutigineqarsimasoq. Tusarniaanermit akissutisarineqartut pisariaqarneratut annertussusilimmik peqqussutissatut siunnersuummut Naalakkersuisut ilaatippaat. Taamatuttaaq inatsisissatut siunnersuut inatsissanik nalilersuisarfimmit misissuataarneqarsimavoq.

Inatsisissatut siunnersuutip imarisai

Malugeqquneqarpoq peqqussutissatut siunnersuut manna malillugu kommunalbestyrelsimut suliaassiissutigineqartut Inatsisartut peqqussutaanni matumani taaneqartut allaffitsigut aquneqarnissaannut kommunalbestyrelsip piareersarfittut ilitsersuisarfittullu qitiusut pilersinnaammagit. Qitiusoqarfinni taakkunani suliffissarsiortut aammattaaq ilinniartitsiviit, ilinniarfiusinnaasut, suliffissatut neqeroorutigineqartut il.il pillugit paasisaqarsinnaapput.

Inuussutissarsiornermut, Nunalerinermut Suliffeqarnermullu Pisorta qarfiup aamma Kultureqarnermut, Ilinniartitaanermut, Iisimatusarnermut Ilageeqarnermullu Pisorta qarfiup kiisalu kommunit ataasiakkaat akornanni maannakkut suleqatigiinnerup kinguneraa Aasianni, Narsami Tasiilamilu najukkani piareersarfittut ilitsersuisarfittullu qitiusunik misiliilluni aqqissuussinerit pilersinneqarmata.

Suliffissanik innersuussisarnerup eqaannerusunngortinnissaa atuisunullu piuminarnerusunngortinnissaa aammalu inunntut ataasiakkaanut sullissinerup annertusineqarnissaa siunertaralugit nuna tamakkerlugu suliffissarsiortarfiup pilersinnissaanut periarfissaq ammarneqarpoq. Suliffissarsiortarfiup taassuma pilersinnissaanut periarfissaq Inatsisartut peqqussutaanni matumani inatsisitigut tunngaveqarnissaa siunnersuutigineqarpoq.

Siunnersuut manna malillugu Naalakkersuisut qitiusoqarfinnut tapiissutinik ingerlatsinermullu tapiissutinik aalajangersaasinnaammata qitiusoqarfinni suliniutit annertusineqarnerisigut siunnersuut Landskarsimut aningaasatigut kinguneqaateqarsinnaavoq. Suliniutit § 5 naapertorlugu inuusuttut sulliviisa aammalu najukkani inuussutissarsiornermik ilinniarfiit

aningsaliivigineqartarnerisa aqqissuussiffigeqqinnerisigut qulakkeerneqassasoq siunertaavoq. Suliniutit siuliani taaneqartut aningaasatigut tunngavissaat aqqissuuffigineqassapput kommunit suleqatiginerisigut. Kommunit aamma Naminersornerullutik Oqartussat akornanni suliassat/nammatassat agguataarneqarnerat tamatumani allannguuteqasslappat, tamanna KANUKOKA-p Naalakkersuisullu akornanni isumaqatigiinniutigineqassaaq.

Ataatsimiititaliap sularinninnera

Ataatsimiititaliap maluginiarpa siunnersuutip aningaasatigut allaffissornikkullu kinguneqaatissaasa erseqqinnerusumik nassuiaatigineqarnissaat arlalinnit ujartorneqarmat. Taamaammat ataatsimiititaliap Inuusutissarsiornermut, Nunalerinermut Suliffeqarnermullu Naalakkersuisoq ataatsimeeqatigaa. Naalakkersuisoq qinnuigineqarpoq peqqussutissatut siunnersuutip aningaasatigut kingunerisassai itisilerlugit nassuiaatigissagai, kiisalu Naalakkersuisut maleruagassanik erseqqinnerusunik aalajangersaasinnaanerinut peqqussutissatut siunnersuummi aalajangersakkat iluserisaat imarisaallu pillugit.

Tassani Naalakkersuisup sammiumallugit toqqarsimasai tassaapput nutaaviit malunnavissumilluunniit allannguuteqarfiusimasut. Ataatsimiititaliap apeqqutaanut Naalakkersuisup akissutai tulliini issuarneqarput.

§§ 2,3 & 4: Kommunalbestyrelsip suliassai.

Kommunalbestyrelsip qanimut suliffeqarnermi ineriartorneq malinnaavigissavaa taamatullu inuusutissarsiuutinut suliffissaqartitsivinnullu nutaanut tunngaviliisuussallutik. Taakkua saniatigut kommunalbestyrelse suliffeqarneq pillugu paasissutissanik katersissaaq naalakkersuisunullu nalunaaruteqassalluni. Paasissutissat/kisitsisit taakkua naalakkersuisut inatsisartut inatsisaat tunngavigalugu nunatsinni naatsersueqqissaartarfimmut atatillugu atorsinnaassavaat

Naalakkersuisut paasissutissat/kisitsisit siunertamut atorsinnaassavaat, nalunaarsuineri maleruqaqusanut attuumassuteqartunut akuerineqarsimasunut, Suliap ilanngunneratigut, tassaassoq Namminersornerullutik oqartussat qitiusumik aqutsiviat qarasaasiamik aallaaveqartoq kisitsisit atorlugit nassuiaatinut allattorsimaffik, suliffeqarneq pillugu misissueqqissaarnermi suliqarnermut tunngaviusoq. Siullerpaamik periarfissaqarpugut isersinnaalluta, suliffeqarnermilu pisariaqartinneqartunik misissueqqissaassalluta, soorlu suliffeqarfiit sorliit sulisussanik amigaateqarnermik eqqorneqarsimappat, ajornartorsiutit kinguarsaataasut ilaalu ilanngullugit. Ajornartorsiutit taakku pillugit nalunaarut malinnaatinneqassaaq paasissutissat suut pineqarnermut erseqqissarneqassallutik, soorunalumi kommunit isumasiorneqassapput, namminnertaaq misissueqqissaarnermi paasissutissat atorluarsinnaaniassammatigit. Suliassaq taanna aallarteriivippoq.

§ 4: Suliffissaaleqineq annertuumik qaffakkiartortoq nalaapparput, unalu Inatsisartut peqqussutaat aallaavigalugu *kommunit* suliffissaqartitsineriut tunngatillugu iliuusissanik aallartitsinissamut siunnersuusiussapput kommuneni sulisartut piginnaasaasa nukittorsarneqarnerisigut. Uani Nalunaarut nr.42, 28.september 1994 meersoq nanginneqassaaq. Kommunit suliffissaqartitsineriut tunngatillugu iliuusissaannut tapiissutit, § 12, imm. 2mut innersuullugu. Kommunalbestyrelsettaa inuusuttunut 25it ataallugit ukiulinnut sammisitanik suliffissaqartitsineriut, ilinniartitaanermullu neqeroorutini aallartitsissaaq. Paragrafi una tunngavigalugu aammalu § 12, imm. 2-mut

innersuullugu Naalackersuisut suliffissaqartitsiniarnermi siuarsaataasunut suliniutinut aammalu inuusuttut kiffartuussinerannut tapiissuteqarsinnaanerannut tunngatillugu, Naalackersuisut nalunaarummik nutaamik piareersaaleruttorput, siusinnerusukkut kommuneni inuusuttut kiffartuussinerannut tapiissutit nalunaarut nr.37 29.december 1995meersumut paarlaassutaasussamik.

§ 5: Inuusutissarsiutinut ilinniartitaanernullu ilitsersuineq kiisalu suliffissanut innersuussisarneq.

1999mi inatsisartut suliaarat akueralugulu STI-mi ilinniartitsissutinik nassuiaat aammalu ilinniartitsissutinut- inuusutissarsiutinullu ilisarititsissutinut nassuiaat ilitsersuullu.

STI-mi ilinniartitaanermut nassuiaatip innersuussutigaa, inuusutissarsiummik ilinniartitaanermik iluarsaassisoqassasoq, inuusutissarsiummik ilinniartitaanermi immikkut ilinniagaasumi pitsaassuseq nukittorsarniarlugu. Pitsaassutsimik pilersitsineq ilaatigut pissaag ilinniartunngornissamut piumasaqaatit sukannernerulersinnerisigut aammalu ilaatigut ilinniartitsinerup nukittorsarneqarneratigut. Kingulleq ilaatigut isumaqarpoq, ilinniartitsinerup aaliangersimasup ilaa STI- p aqqissuussaanerata iluaniittoq piffinni inuusutissarsiutigalugu atuarfinni tamaniittoq, inuusutissarsiummut atuarfiusunut annertunerusumik katersorneqassasoq imaluunniit nunap immikkoortuini atuarfinnut ikinnerusunut katersorneqassasoq.

Tamatuma kingorna STI-mik nassuiaat tunngavigalugu, inuusutissarsiummik ilinniartitaanermi aqqissuussisoqarsimavoq, tamannalu isumaqarpoq massakut piffinni inuusutissarsiutinut atuarfiit ilai annikitsuinnarmik ingerlatsimmata, taamaalillutik periarfissamik inissaqartitsillutik.

Ilinniartsitaanermut- inuusutissarsiutinullu ilisarititsissutip nassuiaataata innersuussutigaa, siunnersuinerup suliniuteqarneq annertummik nakussassarneqassasoq. Siunnersuinerup pitsaangorsarneqarnerata ilinniartitsissutinut ilinniartitsissutinut minnerpaaffileeqataassamat, ilinniarniarlutik qinnuteqartartut amerlasuut misigisimangimmata, ilinniartitsissutinut aaliangertarnertik siunnersuinerup naammaginartumik pitsaassusilimmik tunngaveqartoq. Nassuiaatip innersuussutigaa piffinni ataasiakkaani ilinniartitaanermut- qitiusumik ilitsisuisarfimmik pilersitsisoqassasoq, aammattaaq kommune-ni ilinniarnermut- inuusutissarsiutinullu ilitsersuutit tamarmik katersorneqassasut, imaluunniit minnerpaamik piffinni inuusutissarsiummik ilinniartitsissutinut siunnersuisarnerup aqqissuunneqarnissaa. Aammattaaq nassuiaatip innersuussutigaa, siunnersuinerup attuumassuteqartumik sulisinnaassusilinnut ukiunut tamanut ilinniarnermik- aammalu inuusutissarsiummik ilisaritsitsinissamik neqerooruteqartitsissarnermik pilersitsisoqassasoq, atuannngitsunut tamanut, ilinniagaqartunut imaluunniit inuusutissarsiutigalugu suliffeqartunut. Ilinniartitaanermut- aammalu inuusutissarsiummik ilisaritsitsinermi neqeroorutit ataasiakkaanut suleriarnissamik pilersaarusiornikkut periarfissiissapput ilinniartitsissutinut toqqakkamut aallartinnissamut piginnaangorsarnissamik, imaluunniit inuusutissarsiutinut toqqakkamut piginnaangorsarnissamik.

Ilinniartitaanermut- aammalu inuusutissarsiummut ilisaritsitsinermik neqeroorutini eqqarsaataasimavoq siusinnerusukkut suliniutaasimasut assingusut katersornissai, soorlu inuusuttut kiffartuussineri, allallu ingerlariaqqinnissamik neqeroorutit, fag-ini ataasiakkaani ilinniartitsinerit aammalu kommune-ni ilinniartitaanermut- inuusutissarsiornermilu siunnersuinerit.

Nassuiaatini siuliani taaneqartuni innersuussutigineqarpoq, piffinni inuussutissarsiutigalugu ilinniartuut kommune-ni suliffeqarfiulissasut, 1988-miit Namminersornerusut Kommune-llu ataatsimut ingerlassimagaluaaraat aningaasartuutit aammalu suliaassat agguataarnerisigut. Namminersornerullutik oqartussat inuussutissarsiutitigut ilinniartitaanermut immikkoortortaqaarfiani sinniisut (KIIP) aammalu suliffissaqartitsiniarnermi immikkoortoqaarfimmi sinniisut (INUUPI) kommune-ni arlalinniissimapput piffinni inuussutissarsiutigalugu ilinniartitaanermut kommune-t ataani suliffeqarfinngortinneqarnissaannik eqqarsaammik paasisitsiniaallutik. Namminersornerullutik oqartussattaq kommune-t ilai isumaqatigiissuteqaarfigisimavaat inuussutissarsiutigalugu inniartitsinerit ilaasa nunap immikkoortuini atuartitsissutigineqarnissaannik nakkutiginittussatut.

Suliffissarsiuussisarnermik suliniutit ataqatigiissaarniarlugit, siunnersuinerimik - ilisaritsinermillu qitiusoq pilersinneqarpoq, taakkua inuussutissarsiutitigut, suliffissaqartitsiniarnermik aammalu ilinniartitaanermut qaffakkiartortut ataatsimut siunnersuineri katersussallugit. Siunnersuinerimut - ilisaritsinermillu qitiusunut nassuiaammik naalakkersuisoqaarfimmi peqartoqarpoq, INUUPI-mit KIIP-millu suliarineqarsimasunik, kommune-llu suleqatitut tusarniaavigineqarsimallutik.

Sulissutigalugu misissorneqarpoq qallunaat misissuiffigininnermik suleriaasiat nunatsinnut atuutilersinneqarsinnaanersoq, makkuninnga iluaqutissartaqartumik, soorlu suliffissaaleqisut pillugit kisitsisit atorlugit nassuiaatinik tiguisinnaaneq, saniatigullu aamma ataasiakkaanut suliarinissamik pilersaarummik suliaqarnermi atortorineqarsinnaalluni.

Aningaasartuutit tunngaviit:

Kommune-ni qitiusumik siunnersuisarfinnik pilersitsisinnaanermi tunngaviummik aningaasartuutissanik naatsersuisoqarsimavoq, taakkualu KANUKOKA-lu eqqartorneqarsimapat. Naatsersuinerilli kommune-t agguasseqqissinnaanermik immikkoortuinit naleqqutinngillat. Kommune-t tamaasa ataasiakkaarlugit naammassisassat pillugit (resultatkontrakter) isumaqatiginninniarfigineqassapput. Massakkuugallartoq pingaaruteqarpoq erseqqissassallugu aningaasatigut aaqqiineq ullumikkut aningaasartuutit tunngavigalugit ingerlassammat, taamaalilluta aaqqiissutip iluarsaannissaanut periarfissaqassaagut, kommune-t pisariaqartitavii aallavigalugit. INUUPI-mit immikkoortinneqarsimapput 10,7 mio. kr.-nit, KIIP-imiillu 9,0 mio. kr.-nit.

§ 7: Nuttarnersitsiniarluni aningaasartuutit (Mobiltetsfremmende ydelse).

Paragraf-i taanna aallaavigalugu suleqatigiisitamik pilersitsisoqarsimavoq ukunanga inuttaqartinneqarluni peqataaffigineqartumik: Inuussutissarsiornermut, nunalerinermut suliffissaqartitsiniarnermullu naalakkersuisoqaarfimmit, inunnik isumaginninnermi naalakkersuisoqaarfimmit, Avatangiisunut ineqarnermullu naalakkersuisoqaarfimmit, KANUKOKA-miillu, aaqqiissutip taamaattup qanimut periarfissaanik misissuisussat .

Nalimmassaanermi siuarsaanermut aningaasartuutit siunertaraat suliffissaqartitsiniarnermi politik-kikkut atortutut sunniuteqarneq. Suliffissaqartitsiniarnermi politik-kup tunngaviummik siunertaraa qulakkiissallugu sulisinnaassutsip akkerliiffiunngitsumik nikerartinneqarsinnaanera.

Suliffissaqartitsiniarnermi politik-imi ajornartorsiutaavoq, nunatta ilaani suliffissarsiortut suliffissarsinnaanngimmata, illuatungaani illoqarfinni allani sulisitsisut sulisussanik nassaarsinnaasanninnerat. Misilittakkat oqaluttuaraat sulisussanik tikiorartsitsineq pisartoq uffa sulisussaq amigaatigineqartoq illoqarfinni allani pigineqartoq.

Illoqarfimmiit illoqarfimmut nuunneq akisoqaaq. Ilaqutariit tamarmik nuunnissamik eqqarsaateqarpata, tamatigoruinnaq apeqquutinngortarpoq ilaqutariit akissaqarnersut. Nuunnermi aningaasartuutit suliffissaqartitsiniarnermut tamaviaarutinngortarput, sulisinnaassuserlu qilersorneqartarluni. Aningaasarsiornikkut ineriartorsinnaaneq sanngiillisinneqarpoq aammalu annertuumik inunnik isumaginninnermut aningaasartuutaalluni.

Nuttarnerulersinnaanissaq pillugu aningaasartuutissat suliffeqarnermi politik-itut isigineqassapput, sulisitsisunut soqutiginnilluni inussiarnisaarnertut, sulisussanik amigaateqartunut, aammalu sulisussanut piginnaasaminut naleqquttumik suliffimmik amigaateqartunut soqutiginniinnertut. Misilittakkat katersoqqaarnissaat pillugu, aallaqqaammut siunnersuutigineqarpoq misiliutitut ingerlanneqassasoq.

Ingerlariaqqinnissamut tunngatillugu nalimmassaanermi siuarsaanermit aningaasartuutitut nalunaarutissatut siunnersuut naalakkersuisoqarfimmit suliarineqarpoq, 2004-llu ingerlanerani tusarniaassutigineqassalluni. Tusarniaanermit periarfissarititaasoq sapaatit akunnerinik sisamanik sivisussuseqassaaq, nalunaarullu 2004-p ingerlanerani Naalakkersuisunit suliarineqarnissaminut piariissalluni, taamaalilluni kommune-t aaqqiissutip 1.januar 2005-mut atulersinnaanissaanut allaffissornikkut aaqqiissuteqarfiginissaa periarfissaqarfiginissammassuk.

Tusarniaanerup affaata kingulliup ingerlanerani, tusarniaanermit suleqatigineqartut aaqqiissut pillugu isumasioqatigiinnermut aggersarneqassapput. Isumasioqatigiinnermi siunertaavoq, siunnersuutip imaata ersarissarneqarnissaa. Isumasioqatigiinnerup pinissaa naatsersuutigineqarpoq kommune-ni suliffissaqartitsiniarnermi suliaqartut il.il. ukiumoortumik pikkorissartitsinissaanut atatillugu pissasoq.

Aningaasanut tunngaviit: Pilersaarutigineqarpoq nalimmassaanermit siuarsaanermit 3.8 mio. kr.-nit ukiumut aningaasaliissutigineqartassasut, kisianni soorunalimi pisariaqartitsineq ingerlaavartumik nalilersorneqartassaaq, eqqartorneqarlunilu.

§ 10: suliffissanik nalunaarsuivik

Aalingersakkap uuma Naalakkersuisut periarfissippai suliffissanik nalunaarsuivimmik pilersitsisinnaanerannik. Naalakkersuisoqarfiup massakkorpiaq periarfissaareersut assigiinngitsut misissorpai, suliffissaqartitsiniarnermut tamarmut pitsaanerpaamik aaqqiissuteqarnissaaq anguniarlugu. Qallunaat nunaanni suliffissarsiuussisarfik aningaasartuutitaqanngitsumik suliffissanik nalunaarsuivianut atassuserneqarsinnaaneq pillugu oqaloqatigineqarsimavoq, taamaalilluni kommune-ni ataasiakkaani sulisitsisullu akornani paasissutissat ikkullugillu peerneqarsinnaangorniassammata. Aaqqiissut taamaattoq suliffinnik 240 time-nik ukiumut naleqassaaq, paasissutissat nunatsinniit nunatsinnullu AF-p qupperneranut isertussat naalakkersuisoqarfimmit sulisumit misissorneqartassammata, soorlu ilaatigut oqaatsit atorneqartut nutsernerisigut.

Aaliangersakkat assigiinngitsut:

§ 11: Naalakkersuisut kommune-ni suliffissaqartitsiniarnermik il.il. suliaqartunik ukiumut pikkorissartitsisassapput. Pikkorissaanermit tamatumunnga aningaasartuutit immikkut konto-mit tiguneqartassapput.

§ 12: Takuuk § 4.

§ 13: Pisariaqartitsineq aalaakkaasumik nalilersorneqartassaaq, aammalu suliffissaqartitsiniarneq pillugu aaqqissuusseqqinermi konto-mut tunngatillugu aningaasartuutissanik immikkoortitsisoqarsimavoq.

§ 14: Ukiumoortumik Nalunaarusiaq. Suliassap taassuma suliarinissaanut utertitsilluni aqutsinermit (mandtimit atorlugit aaqqiineq) allannguinnikkut pissarsiortoqassaaq qaammatikkaartumik naalakkersuisunut nalunaaruteqartarnikkut, ukiullu affakkaartumik nalilersorneqartartussatigut.

Naalakkersuisup akissutai tamatuma kingorna itisilerlugit nassuiarneqartut iluarisimaarini ataatsimiititaliap oqaatigaa.

-

Ataatsimiititaliaq isumaqatigiittoq siunnersuut pillugu ima oqaaseqaateqarpoq:

- Siunnersuut tamanit taparserneqartoq.

- Peqqussutissatut siunnersuutip pitsaaqutaanut ilaapput suliffeqarnermi innersuussisarnerup eqaannerulernissaa atuisunullu atoruminarnerulernissaa, aammalu ataasiakkaanut annertunerusumik sulissisoqarsinnaangornissaa. Soorlu suliffeqanngitsut ilinniarfinnut, ilinniarnissamut periarfissanut, suliffissanut neqeroorutinut il.il. ilisimanninnerulernissamut aqutissiuussisussaapput.

- Siunnersuut naapertorlugu unarput tamakkerlugu suliffissarsiuussisarnermik pilersitsisoqassasoq, sulisussatut pisariaqartinneqartunik atugassiinissaaq annertunarpaamik periarfissiuunneqassalluni. Ataatsimiititaliaq isumaqarpoq ineriartorneq taamaattoq tapersiivigisariaqartoq.

- Peqqussutissatut siunnersuut piareersarfittut ilitsersuisarfittullu qitiusunik, kommunit ilaasa misileraanertut ingerlateriigaannik, pilersitsinissamut kommuninut periarfissiisoq. Ataatsimiititaliap qularutiginnilaa suliffissarsiuussisarnermi siunissami suliniuteqarnerit sakkussatut atorqearsinnaasut atorlugit maannamornit pitsaanerujussuannagortinneqarsinnaasut.

-

Ataatsimiititaliap isumaqatigiittup tamanna tunngavigalugu siunnersuut Inatsisartut akuersissutigissagaat inassutigaa.

Taama oqaaseqarluni Inatsisartut Inuussutissarsiornermut Ataatsimiititaliap siunnersuut aappasaaniigassanngortippaa.

Ole Dorph, Siumut,
siulittaasoq

Ane Hansen, Inuit
Ataqtigiit
siulittaasup tullia

Ruth Heilmann, Siumut

Finn Karlsen, Atassut

Per Skaaning,
Demokraatit